





皇明異姓諸侯傳序

我

朝初起淮甸旋定江東收拓疆宇

漢之功為最取幽燕次之次汝

次吳次閩越次蜀又次滇南當是時功臣封

者食租衣稅雖不得分土臨民而鐵券寶綸

天盟廟授追崇之禮過于商周世宥之恩寬

于漢魏矣

高皇帝撫運開天刑用重典藍胡詔雪誅鋤萬數

相國慘於繫蕭督府嚴於誅越豈非功高過



大疑積釁深人主卽欲包荒法吏致其深數
寵祿浚剝宗姓殲夷勢運然也况革除之後
輝祖以守義釋囚景隆以負國淹繫江陰失
律遼西長興喪師真定越雋安陸之流乍承
收復終歸氓隸故其存者魏西平武定三家耳
成祖靖難以九門壩上白溝滄州藁城夾河靈璧
七戰論功已而北驅殘虜南縛交酋西靖羌
番東捕倭韓舊恩新績降胡廝養往往登封
洪熙宣德文教漸張九伯皆特轅欵塞合騎
從征頗稱不僭正統景泰天順間醜戎猾夏

奸黨貪天已巳丁丑剖符益衆朱幾誅奪存
亦無幾成化時國家治平屯細柳出居胥雖
師律尚嚴而檢覈多濫以故傳世者鮮弘治
熙熙慎名與器封者無聞焉正德間汨廢典
章黷濫極矣

今皇帝洗滌乾坤光復

祖憲

登極之詔首錄擒反者宸濠功已而秉鬯宗禋
顧瞻烝侑悼念元勳興滅繼絕五姓續封於
斯善述若乃外戚恩澤封者洪武永樂未之

前聞增壽雖

文后介弟顧靖難密謀殞命
廷闕

長陵悼念子封定國至

獻陵卽位杲始以

昭后恩封

裕陵又封杲弟昇自是進紀褒申更相援引

今皇帝若曰營丘以鷹揚裂土建成以馬馱受盟

后家封爵

皇祖未有典制魏定封公雖緣戚里實開國靖難

佐命功臣彭城惠安軍功居半可世如故他
皆宜革徒以

先朝恩命錄之且終其身自是慶陽太和皆罷
封稍稍陳乞或得都督都指揮指揮云今攷
累朝封者公十八人侯八十三人伯八十八人
王一人外戚公一人侯五人伯十一人凡二
百七人乃今世及者纔四十四人其以文臣
封者公一人伯八人不得嗣者乃七人畧考
其狀世次爲異姓諸侯傳令後世得覽云道
德勲庸最著者錄諸名臣記

嘉靖甲子三月三日鄭曉識

皇明異姓諸侯表

吾學編第十七

姓名 功 封邑爵 祿 進封 世 除 世 續封

徐達 開國信國公 伍千石 魏 世

李善長 開國宣國公 四千石 韓 除

常遇春 開國鄂國公 除 懷遠侯

李文忠 開國曹國公 叁千石 除 臨淮侯

馮勝 開國宋國公 叁千石 除

鄧愈 開國衛國公 叁千石 申 除 定遠侯

常茂 父遇春 鄭國公 除

湯和 開國中山侯 千伍百石 信國公 除 靈璧侯

嘉靖甲子三月三日鄭曉識

皇明異姓諸侯表

吾學編第十七

姓名 功 封邑爵 祿 進封 除世 續封

徐達 開國信國公 伍千石 魏 世

李善長 開國宣國公 四千石 韓 除

常遇春 開國鄂國公 除 懷遠侯

李文忠 開國曹國公 叁千石 除 臨淮侯

馮勝 開國宋國公 叁千石 除

鄧愈 開國衛國公 叁千石 申 除 定遠侯

常茂 父遇春 鄭國公 除

湯和 開國中山侯 千伍百石 信國公 除 靈璧侯

唐勝宗	開國	延安侯	千伍百石	除
陸仲亨	開國	吉安侯	千伍百石	除
周德興	開國	江夏侯	千伍百石	除
華雲龍	開國	淮安侯	千伍百石	除
顧時	開國	濟寧侯	千伍百石	除
耿炳文	開國	長興侯	千伍百石	除
陳德	開國	臨江侯	千伍百石	除
郭子興	開國	鞏昌侯	千伍百石	除
王志	開國	六安侯	玖百石	除
鄭遇春	開國	滎陽侯	玖百石	除

費聚	開國	平涼侯	千伍百石	除
吳良	開國	江陰侯	千伍百石	除
吳禎	開國	靖海侯	千伍百石	除
趙庸	開國	南雄侯	千伍百石	除
廖永忠	開國	德慶侯	千伍百石	除
俞通源	開國	南安侯	千伍百石	除
華高	開國	廣德侯	陸百石	無子除
楊璟	開國	營陽侯	千伍百石	除
康鐸	父茂才	蕪春侯	千伍百石	除
朱亮祖	開國	永嘉侯	千伍百石	除

皇生者侯表

二

二百五十九

傅友德	開國	潁川侯	千伍百石	潁國公	除
胡美	開國	豫章侯	千伍百石	臨川侯	除
韓政	開國	東平侯	千伍百石		除
黃彬	開國	宜春侯	玖百石		除
曹良臣	開國	宣寧侯	玖百石		除
梅思祖	開國	汝南侯	玖百石		除
陸聚	開國	河南侯	玖百石		除
汪廣洋	開國	忠勤伯	叁千陸石		除
劉基	開國	誠意伯	貳百伍拾石		除
薛顯	開國	永誠侯	千伍百石		除
					續封

沐英	征西	西平侯	貳千伍石		世
仇成	征西	安慶侯	貳千伍石		除
藍玉	征西	永昌侯	貳千伍石	涼國公	除
謝成	征西	永平侯	貳千石		除
張龍	征西	鳳翔侯	貳千伍石		除
吳復	征西	安陸侯	貳千伍石		除
金朝興	征西	宣德侯	貳千伍石		除
曹興	征西	懷遠侯	貳千石		除
葉昇	征西	靖寧侯	貳千石		除
曹震	征西	景川侯	貳千石		除

皇朝諸侯表

三

載

張溫	征西會寧侯	貳千石	除
周武	征西雄武侯	貳千伍石	除
王弼	征西定遠侯	貳千伍石	除
陳桓	平雲南普定侯	貳千伍石	除
胡海	平雲南東川侯	貳千伍石	除
郭英	平雲南武定侯	貳千伍石	除
張翼	平雲南鶴慶侯	貳千伍石	除
李新	作孝陵崇山侯	千伍百石	除
汪興祖	開國東勝侯	千伍百石	除
張赫	海運航海侯	貳千石	除

朱壽	海運舳舻侯	貳千石	除
孫恪	征胡金寧侯	貳千石	除
濮璵	父英西涼侯	貳千伍石	除
桑敬	父世徽先伯	千柒百石	除
俞通淵	征南越嵩侯	貳千伍石	除
張銓	征蠻永寧侯	千伍百石	除
胡顯	征蠻梁國公		除
何真	歸降東莞伯	千伍百石	除
陳理	降王歸德侯		徙高麗
陳普才	友諒承恩侯		除

陳友富	友諒	歸仁伯	除
陳友直	友諒	懷恩伯	除
明昇	降王	歸義侯	徙高麗
買的里剌	元主	崇禮侯	歸北
納哈出	降胡	海西侯	
察罕	納哈	潘海侯	除
常昇	父遇	開國公	永樂除
盛庸	戰勝	歷城侯	千石
李堅	戰勝	灤城侯	千石
右洪武年封			
			永樂除
			永樂除

右建文年封

丘福	靖難	淇國公	貳千伍百石	除
朱能	靖難	成國公	參千伍百石	世
張武	靖難	成陽侯	千伍百石	無子除
陳珪	靖難	太寧侯	千貳百石	世
鄭亨	靖難	武安侯	千伍百石	世
孟善	靖難	保定侯	千貳百石	除
火真	靖難	同安侯	千伍百石	除
顧成	靖難	鎮遠侯	千伍百石	世
王忠	靖難	靖安侯	千石	除

徐忠	靖難永康侯	千壹百石	世
張信	靖難隆平侯	千石	世
李遠	靖難安平侯	千石	除
郭亮	靖難成安侯	千貳百石	世
房寬	靖難思恩侯	捌百石	著擢
王寧	推戴永春伯	千石	除
徐祥	靖難興安伯	千石	世
徐理	靖難武康伯	千石	無除
李濟	靖難襄城伯	千石	流侯世伯
張輔	靖難信安伯	叁千石	世

新城侯
英國公

唐雲	靖難新昌伯	千石	著擢
譚忠	父淵新寧伯	千石	世
孫岩	靖難應城伯	千石	世
房勝	靖難富昌伯	千石	著擢
陳旭	靖難雲陽伯	千石	無子除
劉才	靖難廣恩伯	玖百石	著擢
茹瑞	推戴忠誠伯	千石	流
王佐	推戴順昌伯	千石	
陳瑄	推戴平江伯	千石	流侯世伯
袁容	靖難廣平侯	千伍百石	著擢

李讓	靖難富陽侯	千石	世	指揮
李彬	靖難豐城侯	千石	世	
陳懋	靖難寧陽伯	千石	侯	世
王通	父真武義伯	千貳百石	成山侯	世伯
王友	靖難清遠伯	千伍百石		除
陳賢	靖難榮昌伯	千石		除
張興	靖難安鄉伯	千石		世
陳志	靖難遂安伯	千石		世
徐景昌	<small>父增壽</small> 定國公	貳千伍百石		世
王聰	靖難武城侯	千伍百石		無除

趙彝	靖難忻城伯	千石		世
宋晟	征西西寧侯	千壹百石		世
沐晟	征西黔國公	叁千石		世
柳升	征西安遠伯	千伍百石		侯
郭義	戰勝安陽侯	千壹百石		世
何福	征胡寧遠侯	千石		除
薛祿	征胡陽武侯	千壹百石		世
劉榮	捕倭廣寧伯	千貳百石		侯
朱榮	征胡武進伯	千貳百石		世
高士文	戰歿建平伯	千叁百石		世

皇朝通志

金玉 征胡惠安伯 捌百石 世指揮

薛斌 征胡永順伯 玖百石 世指揮

薛貴 征胡安順伯 玖百石

吳允誠 征胡恭順伯 千貳百石侯 世

金忠 降胡忠勇王 千石

右永樂年封

梁銘 靖難保定伯 千石 世

蔣廷珪 保昌伯 世

吳成 征胡清平伯 千壹百石 世

吳管者 征胡廣義伯 千石

李賢 征胡忠勤伯 千壹百石 右洪熙年封

費瓛 征胡崇信伯 千壹百石 世

李玉 征胡新建伯 捌百石 除

滕定 征胡奉化伯 捌百石 世指揮

李英 征胡會寧伯 捌百石 世指揮

金順 征胡順義伯 捌百石 世指揮

右宣德年封

蔣貴 征胡定西伯 千伍百石 世

趙安 征胡會川伯 千石 世指揮

任禮	征胡寧遠伯	千貳百石	失律除
沈清	營建修武伯	千壹百石	世指揮使
譚廣	征胡永寧伯	千石	世指揮使
陳懷	征胡平鄉伯	千壹百石	世指揮使
馬亮	征胡招遠伯	千壹百石	世指揮使
王驥	征蠻靖遠伯	千叁百石	世
蔣信	征胡忠勇伯	千石	除
右正統年封			
楊洪	禦胡昌平伯	千石	世指揮使
石亨	禦胡武清伯	叁千石	除

侯忠國公

石彪	禦胡定遠伯	千石	侯除
郭登	禦胡定襄伯	千壹百石	<small>無子</small> 世指揮使
朱謙	禦胡撫寧伯	千貳百石	<small>侯保國公</small> 世侯
方瑛	征蠻南和伯	千石	流侯世伯
毛勝	征蠻南寧伯	千石	世
右景泰年封			
徐有貞	奪門武功伯	千壹百石	除
楊善	奪門興濟伯	千貳百石	世指揮使
張輓	奪門文安伯	千貳百石	世指揮使
張軌	奪門太平侯	貳千石	世指揮使

孫鏜	奪門懷寧伯	千叁百石侯	世
衛穎	奪門宣城伯	千壹百石	世
曹欽	奪門昭武伯	千貳百石	除
楊信	禦胡彰武伯	千石	世
楊能	禦胡武強伯	千石	藉擢使
陳友	征蠻武平伯	千石	流侯世伯
曹義	禦胡豐潤伯	千貳百石	世
施聚	禦胡懷柔伯	千壹百石	世
焦禮	禦胡東寧伯	千貳百石	世
董興	禦胡海寧伯		除

李文 禦胡高陽伯 除

右天順年封

劉聚	禦胡寧晉伯	千石	世
毛忠	征番伏羌伯	千石	世
趙輔	征蠻武靖伯	千貳百石	世
趙勝	營建昌寧伯	千石	藉擢使
王越	征胡威寧伯	千陸百石	除
李震	討賊興寧伯	千石	除
羅秉忠	征蠻順義伯	千石	除
和勇	征蠻靖安伯	千壹百石	藉擢使

右成化年封

仇鉞	捕反咸寧伯	千壹百石	侯	罪除
神英	禦胡涇陽伯	捌百石		除
張富	<small>太監弟</small> 秦安伯	千石		除
張容	<small>太監弟</small> 安定伯	千石		除
武德	義兒永壽伯	千石		除
谷大寬	<small>太監用兄</small> 高平伯	千石		除
馬山	<small>太監成兄</small> 平涼伯	千石		除
陸永	<small>太監弟</small> 鎮平伯	千石		除
魏英	<small>太監弟</small> 鎮安伯	千石		除

右正德年封

谷大亮	<small>太監用弟</small> 永清伯	千石		除
江彬	義兒平虜伯	千石		罪除
許太	義兒永定伯			除
王守仁	捕反新建伯	千石		
陶仲文	恭誠伯	千貳百石		

皇明異姓諸侯表

皇明恩澤侯表

家

名

封邑爵

祿

進封

除世

續封

孝誠昭后

昶

彭城伯

千伍百石

世

孝恭章后

昇

惠安伯

千壹百石

世

孝莊吳太后

忠

會昌伯

千貳百石侯

除

孝肅太后

安

安平伯

千石

除

孝莊春后

承宗

安昌伯

千石

除

孝肅太后

壽

慶雲伯

千石

侯

除

孝貞

彘

長寧伯

千石

除

純后

源

瑞安伯

千石

侯

除

陳於二月

慈孝 獻后	孝靜 毅后	孝潔 皇后	孝烈 皇后	永康 公主	清	崇善伯	千石	除
孝惠 太后	孝康 敬后	喜	昌化伯	千石	除	除	除	除
壽寧伯	千伍百石	侯	昌國公	除	除	除	除	除
延齡建昌伯	千陸百石	侯	除	除	除	除	除	除
輪	玉田伯	千石	除	除	除	除	除	除
儒	慶陽伯	千石	除	除	除	除	除	除
萬言太和伯	千石	除	除	除	除	除	除	除
銳	安平伯	千石	侯	除	除	除	除	除
駑隼京山侯	千伍百石	除	除	除	除	除	除	除

表終

皇明異姓諸侯傳上卷目錄

郭英	馮勝	藍玉	汪廣洋
桑敬	廖永忠	俞通源	俞通淵
吳良	吳復	康茂才	耿炳文
唐勝宗	陸仲亨	周德興	華雲龍
顧時	陳德	郭子興	王志
鄭遇春	費聚	吳禎	趙庸
華高	朱亮祖	胡美	韓政
黃彬	曹良臣	梅思祖	陸聚
葉昇	張溫	王弼	曹震

一陳元一百七十二

曹興 周武 金朝興 薛顯

胡海 張翼 仇成 楊璟

汪興祖 張龍 陳桓 張赫

朱壽 張銓 孫恪 濮璵

李新 謝成 胡顯 何真

陳理 買的里八刺 納哈出

盛庸 李堅

皇明異姓諸侯傳上卷

皇明異姓諸侯傳上卷 吾學編第十八

海鹽鄭曉

吳元年平吳封李善長宣國公徐達信國公常遇春鄂國公洪武三年冬大封功臣 上御奉天殿

皇太子諸王侍左右丞相善長達率文武百官立

丹陛下 上諭諸將曰汝等其聽朕今日定封行

賞非出已私皆倣古先聖王之典籌之二年以征

討未暇故至今日思昔創業之初天下擾亂羣雄

並起當時有心於建功立業者往往無法以馭下

故皆無成朕本無意天下今日成此大業寔天地

神明之眷祐有非人力所致然自起兵以來諸將從朕披堅執銳以征討四方戰勝攻取其功何可忘今天下既定用報以爵賞其新附將帥有功者亦如之凡今爵賞次第皆朕自定至公無私如御史大夫湯和與朕同里閉結髮相從屢建功勞然嗜酒妄殺不由法度趙庸從李文忠取應昌其功不細而乃私其奴婢廢國法廖永忠戰鄱陽時奮勇忘身與敵舟相拒朕見之可謂奇男子然而使所善儒士窺朕意向以邀封爵僉都督郭子興不奉主將之命不守紀律雖有勞未足掩過此四人

止封爲侯平章文忠總兵應昌逐前元太子遠遁沙漠獲其皇孫妃嬪重寶悉歸朝廷此功最大御史大夫鄧愈自幼相從屢更任使雖經摧挫口無怨言此二人者宜列公爵左丞相善長雖無汗馬之勞然事朕最久供給軍食未嘗缺乏右丞相達與朕同鄉里朕起兵時卽從征討四方摧強撫順勞勩居多此二人者已列公爵宜進封大國以示嘉褒餘悉據功定封書云德懋懋官功懋懋賞今日所定如爵不稱德賞不酬勞卿等宜廷論無後言諸將咸頓首悅服遂班爵行賞封公六人侯二

十八人是年又封伯二人侯一人四年又封侯一人十年進封公一人侯一人十二年又封侯十二人十九年論雲南功進封公一人侯四人十七年定功臣次第與前稍異功高望重連歲總兵者八人魏曹宋衛信國五公長興江陰西平三侯專簿書而聽指示者韓國公一人以義氣而封者三人營陽六安平涼三侯所在隨軍征討累有戰將之功未有總兵之名而論舊封者江夏鞏昌南雄安慶崇山南安永平鳳翔靖海東勝普定航海舳艫德慶臨江濟寧延安吉安淮安侯十九人建功者

潁涼國公二人靖寧會寧定遠武定景川懷遠雄武安陸宣德永城東川鶴慶永嘉侯十三人因父功而封者開國公一人蘄春金寧西涼侯三人持兵負固於兩間可觀望而不觀望來歸者東平宣寧滎陽河南汝南宜春豫章侯七人二十三年五月肅清逆黨命刑部尚書楊靖條示天下 上口詔幾四千言是年賜功臣家屯戍百戶印及鐵冊功臣人與奴軍百二十人功臣卒罷屯戍入衛建文四年九月 文皇封賞功臣公二人侯伯各十三人加祿一人贈公二人侯二人已而又封侯三

人伯六人徐增壽先贈武陽侯永樂二年贈定國公異姓諸侯如中山開平岐陽寧河東甌黔寧東平定興定遠八王李太師劉文成傅穎公陳平江鄭武安薛陽武宋西寧劉廣寧郭定襄楊昌平王靖遠王威寧王新建立功傳世在名臣記中

郭英

郭英濠人癸巳年十八從上起義兵宿帳中從取滁和渡江克采石太平破陳兆先定金陵下鎮江廣德寧國江陰征無錫傷脇破常熟傷足攻安慶傷臂攻高郵弩傷膝克帶刀舍人援安豐敗吳

六上征漢大戰鄱陽湖英裹瘡力疾乘海船鏖戰敗漢人禁江口征武昌保安門又傷手足漢陳僉同者驍將善槩馳入中軍上方坐胡床呼曰郭四爲吾殺賊英持鎗躍馬奮臂一呼賊應手斃上解赤戰袍衣之曰唐尉遲敬德不汝過也攻岳州敗潑張援兵擒屠鎮撫克管軍頭目還克廬江襄陽陞千戶克淮安安豐陞驍騎指揮僉事從大將軍北定中原還兵渡河北取彰德廣平至直沽遂破通州克永平轉戰晉冀關隴陞指揮副使攻破王保保營至察罕惱兒歷陞河南都指揮

赴鎮 上寧妃英女弟也遣餞之第英素清儉賜白金二十罌廐馬二十匹移鎮北平召進督府僉事從征雲南功多洪武十九年封武定侯食祿二千五百石與世券克靖海將軍鎮遼東討納哈出進征虜右副將軍仍鎮遼東討虜至捕魚兒海手斬蠻子太尉獲金寶珍玩圖書馬四萬復征迤北斬獲功多賜賚遣歸鄉召還京統禁兵東征朶顏西討川陝叛寇御史裴承祖劾英養家奴百五十人輒殺人 上不問建文時從炳文景隆用兵靖難後罷歸第永樂元年卒贈營國公謚武襄子男

十二人鎮駙馬都尉尚永嘉公主女二遼郢二王妃長孫女 仁宗貴妃珵以貴妃弟故得嗣侯宣德中珵署宗人府事奪河間民田廬又奪天津屯田千九十畝罪其奴宥珵十年永嘉公主乞子珍嗣侯 英宗念珍本英嫡孫與錦衣衛指揮僉事已而珵子聰與珍爭嗣侯並勒停亦與聰錦衣指揮僉事天順元年詔恩嗣侯諸大臣言英適長曾孫昌宜嗣昌者珍長子也聰又與昌爭 上許昌嗣五年昌卒子良優給成化四年聰又言良非昌子停良嗣與指揮僉事錦衣已而良屢乞嗣并奪

指揮閑住弘治二年良又乞嗣下刑部獄三年復良指揮僉事已而郭宗人共乞擇英諸孫一人嗣侯下廷議皆言良本英適玄孫上許良嗣正德二年卒子勛嗣爲團營總兵加保傳嘉靖八年作威福自恣楊一清惡之會御史趙鏜論劾奪團營總兵保傳寄祿中府以張孚敬薦九年復保傳總兵提督郊廟工十六年勛乞進英太廟侑享禮官言官及戶部侍郎唐胄皆言英不當侑享胄言尤明悉勛請益力英竟得侑享十八年扈駕巡承天進封翊國公勛戇直好指斥人貴溪惡之二十年

馮勝

都給事中高時劾勛下詔獄移刑部獄諸大臣會鞫論當死留中勛死於獄已而貴溪死西市時論死繫臺獄久之勛子守乾嗣侯

馮勝初名國勝又名宗異後更名勝兄國用自有傳勝兄弟相與講讀兵書夜分不寢智略日充射百步外輒中甲午同謁太祖於妙山從克滁和乙未渡江取太平擒也先上釋也先勝兄弟察也先有異志曲防之竟不能爲害丙申敗蠻子海牙舟師克臺城還軍擊鎮江丹徒寧國擢萬戶丁

酉克甘露松山望亭戊戌取泰興宜興授元帥守
禦會國用卒子幼庚子勝嗣官掌親軍友諒陷太
平寇龍灣擊友諒石灰山破其中堅追至采石大
戰復太平辛丑攻高郵從 上征友諒擣安慶長
驅至江州陞都護癸卯士誠圍安豐號二十萬劉
福通請援敵殺福通圍益急勝從 上奮擊敗敵
陞同知樞密院調擊廬州甲辰平漢克廬州走左
君弼乙巳取江西同達遇春取淮東丙午下安豐
薄浙西克舊館執呂珍徇湖州城李伯昇降進圍
蘇州丁未召還治軍府事叅知政事張昶陰事覺

勝鞠誅昶以平吳功陞右都督是冬領偏師北伐
下山東洪武元年兼太子右詹事引兵遡河取汴
洛趨潼關破守將張德欽穆薛飛等奪關遂取華
州還汴謁 上授右副將軍留守調征山西克懷
慶兵至太行山破子關進取澤州賀宗哲遁克潞
太原克平陽授征西將軍克河中陝西鳳翔李思
齊西奔臨洮取隴州鞏昌進征臨洮思齊降從大
將軍圍慶陽擊敗張良臣復與大將軍謀移軍扼
原州絕良臣聲援遂克慶陽承制統兵鎮守下河
州不俟命輒還京 上詰責勝宥之三年爲右副

將軍帥師自潼關出西安王保保等俱北竄自秦州南出一百八渡至略陽擒元平章蔡琳遂入沔州遣金興旺張龍由鳳翔入連雲棧合兵攻克興元又西平土番授開國輔運推誠宣力武臣封宋國公叅軍國事食祿三千石賜世券四年鎮陝西五年爲征西將軍與副將軍傅友德陳德等北征敗虜別力篤山分兵取甘州破元將失刺罕兵拔肅州至亦集乃六年練兵臨清北平大同八年自大同征散不剌還鎮陝西九年練兵西征十年鎮河南召至京十一年還鎮十二年董建周王宮殿

大將軍征乃兒不花勝爲征虜將軍節制河南勅勝曰今天象有警占在大梁乃爾封地就語都指揮馬兒宜慎防刺客未逾月又勅勝曰天象屢見不可不警秦晉二王還京宜選精銳嚴宿衛二王至宋國公迎都指揮守城卽都指揮迎宋國公守官兵三之一迎餘悉城守慎毋忽十八年召授征虜大將軍北征練兵絳橋兩月而還是時納哈出擁衆金山數寇邊二十年爲征虜大將軍總兵三十萬踰金山降其部將觀童納哈出分兵爲三營輜重富盛虜主數招不聽勝進兵逼其營乃刺吾

勸之降猶豫未決勝遣馬指揮往諭納哈出遣使
陽納欵覘我兵勝遣藍玉往受降納哈出見玉大
喜與飲酒歡甚酌酒酬玉玉解衣衣之曰請服此
而後飲納哈出不肯服玉持酒不飲爭讓久之納
哈出取酒澆地顧其下咄咄語將脫去時鄭國公
常茂在坐茂麾下趙指揮者解胡語告茂直前搏
納哈出大驚起欲就馬茂拔刀砍傷其臂不得出
都督耿忠遂擁之見勝時納哈出所部妻子將士
凡十餘萬在松花江北聞納哈出傷大驚潰勝遣
觀童往諭降其衆凡二十萬人輜畜亘百餘里納

哈出有二姪不肯降勝復遣諭再三折弓矢擲地
來降勝禮遇納哈出令耿忠與同寢食遣使奏捷
并劾茂驚潰虜衆狀遂班師令都督濮英將騎兵
殿英遇虜伏被執死勝驅降衆二十萬入山海關
茂亦許勝軍中事召還奉朝請二十一年領東昌
諸胡兵征雲南胡兵中道叛是冬鎮永寧撫安胡
兵二十三年詔還鄉明年來朝命堞軍山西屯種
大同二十五年加太子太師二十七年諭勝曰天
道以有餘補不足人反其道廼以不足奉有餘嗚
呼禍福之來皆人自致朕命卿子出鎮西鄙近以

家人違令聞朕朕察言觀色良由不得其所故爾
然小人略無怨言誠可愛惜朕念卿昆弟相從開
國有功且聯姻親不忍不爲卿言自後役人俾得
從容足衣食無窘迫自然効力下無怨咨則家道
昌矣二十八年卒勝爲偏將時勇悍善戰及爲大
將軍稍廢紀律金山之役有大功 上顧不悅卒
之日贈卹不及諸元勳

藍玉

藍玉定遠人長身頰面言動異常始以開平王妻
弟從征摧鋒突圍累功至都督洪武十二年以征

西番功封永昌侯食祿二千五百石與世券從頰
川侯征雲南戰捷又出塞征納哈出從馮勝有功
二十一年代勝爲征虜大將軍率師十五萬出大
寧進至慶州聞虜主脫古思帖木兒在捕魚海間
道兼程而進至百眼井去海四十里不見虜欲引
還定遠侯王弼曰吾輩提十餘萬衆深入虜地無
所得遽班師勞人費財何以復命玉曰然令諸軍
穴地而爨母令虜見煙火乘夜至海南瞰知虜主
營在海東北八十里玉令弼爲前鋒直薄其營虜
始謂我軍乏水草不能深入不設備會大風揚沙

書晦虜不知我兵至虜主方欲北走忽見我兵合
戰殺其大將脫古思帖木兒與其太子天保奴知
院捍怯來丞相失烈門等數十騎遁去玉率精騎
追之不及還獲虜主少兒地保奴等六十四人及
故太子必里禿妃公主等五十九人搜林莽降獲
官酋男婦八萬人玉璽金印圖書牌及馬駝牛羊
十五萬遣人奏捷遂班師又破哈刺章營獲人畜
六萬歸至北平以名馬獻 文皇不受玉慙謝歸
見太子太子妃開平王女也因說太子曰殿下試
觀皇上於諸子中最愛者爲誰太子曰鳴鳩之愛

焉有軒輊玉頓首曰臣觀燕王英武得人心威名
日盛皇上所最愛又聞術者言燕地有天子氣臣
幸托肺腑願殿下自愛以北伐功進封涼國公二
十三年晉燕論征胡功太子右晉王玉功高驕橫
上不喜會有訐玉出塞陰事者 上詰玉玉應對
不謹 上大怒念玉功忍未發二十六年遣玉西
征加玉太傅玉不喜曰我功不得爲太師乎及奏
事 上輒不允玉曰疑我矣錦衣指揮蔣瓖遂告
玉謀反簿錄其家凡有片紙隻字者並逮獄獄上
集羣臣廷議玉強辯轉展攀染不肯服吏部尚書

詹徽叱玉吐實無徒株連人玉大呼曰徽卽吾黨
遂併殺徽及詩人王行孫蕢是歲九月詔曰藍賊
爲亂謀泄族誅者已萬五千人自今胡黨藍黨皆
赦不問徽素刻薄嘗陷李善長又惡解縉爲虞部
郎中王朝用草疏申救善長并欲中縉危法懿文
太子亦恨徽徽與太子錄囚太子欲開釋徽輒文
附重法太子爲白 上先入徽言謂太子曰徽執
者法也太子因言立國以仁厚爲本 上笑曰汝
欲遂自爲皇帝耶太子懼因感疾卒謂建文君曰
詹徽殺我建文君爲太孫錄藍獄命先斷徽手足

戮於市

汪廣洋

汪廣洋字朝宗高郵人廣洋寬和簡重通經能文
善篆隸大書尤工詩歌少從余闕學游太平乙未
上渡江召廣洋入見與語大悅留幕下爲元帥府
令史行樞密院掾史江南行省提控丁酉除照磨
己亥立執法議理司大書四字牌 上以廣洋李
勝端爲執法官朝政有失執牌直諫又名爲都諫
官辛丑遷江南行省都事陞郎中甲辰立中書省
改右司郎中尋知驍騎衛事常將軍下贛州廣洋

出叅軍事遂守贛州尋陞江西行省叅政洪武元年開省山東廣洋以廉明持正改山東安輯有勞是冬召入中書爲叅政明年出叅政陝西三年李丞相病召入爲左丞時楊憲以山西叅政先召入爲右丞惡廣洋軋已嗾侍御史劉炳劾廣洋不孝上切責斥還鄉憲意未已又嗾炳劾廣洋謫海南李丞相奏憲誣大臣放肆爲奸上誅憲召廣洋還是年冬與劉基同日受封封廣洋護軍忠勤伯食祿三千六百石誥詞比之子房孔明四年善長致仕廣洋爲右丞相叅知政事胡惟庸爲左丞六

年進左丞相惟庸爲右丞相尋廣洋坐畏懦迂猾斥爲廣東叅政逾年召爲左御史大夫十年復爲左丞相上益厚廣洋未幾上以惟庸暴橫廣洋荒於酒色怠棄政機浮沉守位勅戒令洗心補過會占城貢使至不以時引見上下勅切責執政廣洋惶懼十二年御史中丞涂節言劉基死毒廣洋宜知狀上問廣洋對無是事上怒廣洋朋黨又謫海南舟至太平上再遣勅責廣洋事朕十餘年不聞一善言不薦一賢士在江西曲庇文正在中書不發揚憲奸惡惟務沉湎不事事廣

洋得書益慙大懼自縊死十三年惟庸坐罪死遂
詔天下罷中書省先是 上下相劉基首問楊憲
憲故與基厚善基對曰宰相持心如水憲有相才
非相器次問廣洋對曰褊淺又次問惟庸曰此小
獷用之將債轅而破犁矣 上曰吾固知無逾先
生者基起頓首謝曰臣疾惡太深又不能煩劇天
下何患無才惟明主博求而慎用之幸甚

桑敬

桑敬父世傑無爲州人世傑有開國功戰歿贈永
義侯侑享太廟自有傳敬以父故陞督府僉事立

功洪武二十三年封徽先伯誥曰朕當羣雄鼎沸
之秋提虎旅東渡大江爾父世傑率舟師來歸由
是被堅執銳數著勤勞旣而歿于戰陣已贈侯爵
功在國家朕不能忘遂陞爾中軍都督府僉事俾
蒙先業屢從征伐克底成功茲又擒除奸兇豈不
彰美前人朕嘉爾忠特封爲推忠協謀武臣龍虎
將軍上護軍徽先伯食祿一千七百石子孫世嗣
二十四年練兵邊塞召還明年又出南陽信陽練
兵繕浚城隍經略屯田明年閱民籍軍屯軍平陽
已而屢出山陝北平練兵

廖永忠

廖永忠巢人父旺子五人永清永寧永堅永安永忠旺扈 上渡江不仕永清以子昇贈指揮僉事永寧早卒永堅仕陳友諒爲叅政來歸亦卒永安沒於吳贈楚國公謚武愍永忠少豪邁有大志智勇過人甲午屯巢湖乙未來歸 上見其年少謂曰汝亦欲圖富貴乎以水將屬永安永忠爲副從渡江拔采石太平蕪湖擒原也先破蠻子海牙陳兆先乘勝定建康克鎮江宣城討江陰海寇皆有功永安陷敵授永忠樞密僉院總永安兵攻普勝

柵江營追殺賊衆復樅陽友諒襲太平犯龍江諸將據險張德勝總兵進擊永忠大呼殺入諸兵從之友諒敗復太平陞同知樞密院事 上率舟師伐友諒至安慶敵固守 上以陸兵疑之敵兵動永忠擊其水寨破敵舟破克安慶追至小孤山次湖口未至江州五里友諒知之窮蹙挈妻子棄城走武昌遂入江州從征南昌南昌降祝宗康泰據南昌叛復從徐將軍討復其城援安豐敗士誠兵是時友諒圍南昌 上討友諒永忠以七舟載葦荻置火藥其中乘風縱火焚戰艦數百艘煙焰漲

天湖水盡赤大敗敵兵友諒移舟近湖口永忠邀其歸路友諒中流矢死擒其太子善兒次子理奔武昌復稱帝 上還論功賜永忠伯 上復征理至武昌永忠等分兵柵四門又於江中聯舟爲長寨絕其出入 上還建康留永忠等守營柵勿與戰 上復往武昌視師督攻城降理陞湖廣行省左丞攻廬州左君弼敗走復援安豐取江西未下州郡從徐將軍常將軍取淮東克海安高郵淮安從拔姑蘇陞中書平章政事湯將軍旣下温台慶元方國珍遁入海島永忠爲副率師自海道會湯

將軍討降國珍得兵械舟楫萬計取福州洪武元年兼同知詹事院事畧定閩中執陳友定克征南將軍朱亮祖副之率舟師由海道取兩廣永忠自福州遣人諭何真真以廣循惠降師至廣州龍潭元將盧左丞降破僞叅政邵宗愚山寨獲宗愚等斬廣州市捕誅諸叛土豪諸郡相繼降檄諭九真日南朱崖儋耳三十餘城皆納印請吏遂進取廣西至梧州降元達魯花赤拜住廣西平章者林時元普顏帖木兒張翔以便宜行事入廣西募兵欲迎戰亮祖勒兵追普顏戰死翔赴水死潯貴等州

郡皆降師次貴州遣亮祖會楊璟收未下州郡兩
廣悉平明年還京 上命太子率百官迎勞龍灣
入見命太子送還第二年撫定泉漳三年封德慶
侯食祿一千五百石賜世券是年湯將軍克征西
將軍永忠爲副率京衛荆湘舟師由瞿塘趨重慶
伐明昇四年和克歸州駐師大溪口永忠率所部
先進至瞿塘關蜀設鐵鎖飛橫據關口我舟不得
進永忠密遣數百人舁小舟踰山度關出上流人
持糧糗帶水筒禦飢渴蜀山多草木將士皆衣青
蓑衣魚貫出崖石間蜀人不覺度已至率精銳出

墨葉渡分兩道夜五鼓攻水陸寨將士皆以鐵裹
頭船火器而前黎明蜀人始覺盡銳來拒永忠已
破其陸寨矣既而將士舁舟踰山出江者一時俱
發上流揚旗鼓譟而下蜀人大駭下流之師亦擁
舟前進發火器夾攻大破之斬其將遂焚三橋斷
橫江鐵索斬溺死者無算飛天張鐵頭張等皆遁
去永忠入夔明日湯將軍兵始至永忠乃與湯將
軍分道並進湯將軍率步騎永忠率舟師會重慶
永忠抵重慶次銅鑼峽昇遣使請永忠軍請降永
忠俟湯將軍至受降下令將士不得侵掠撫諭向

大亨戴壽等家令持書往成都招諭遣指揮萬德送昇等并降表京師蜀平凱還賜第京師又出征胡捕倭八年卒子權娶湯將軍女爲散騎舍人九年從馮勝練兵西安十一年從御史大夫丁玉征松壘十三年嗣侯十四年從傅將軍征雲南十五年領兵守畢節移守瀘州十六年召還十七年卒從子昇淮安衛指揮僉事陞同知蘇州衛事

俞通源

俞通源字百川巢人父廷玉兄通海通淵結寨巢湖自守 上駐兵和陽歸欵時 上方欲渡江得

廷玉水軍甚喜率師至巢湖拔廷玉出寨從渡江破蠻子海牙又破陳兆先定臺城鎮江復池州陞廷玉僉樞院事總水軍攻安慶戰趙普勝沒追封河間郡公通源屢從征與父兄立功通海卒通源卽軍中領其衆攻蘇州擒士誠嗣通海官從大將軍征中原下山東河南北山西諸郡督副將馮宗異等會兵太原取陝西克慶陽慶陽未下也張良臣再叛扇黨與爲聲援通源率師自臨洮疾趨至涇州略其西路顧時略其北傅友德略其東南大將軍兵合圍良臣竟援絕糧盡窘戰死西征王保

保獲畜產萬計出連雲棧克興元皆先登洪武三年封南安侯食祿千五百石與世券從廖永忠伐蜀又從魏國公出塞征其肅有功八年徙江南豪十四萬田鳳陽命通源撫輯開水利墾田改鎮雲南征廣南諸蠻俘斬萬數二十二年詔還鄉未行卒卒後逾年坐黨事以死不究

俞通淵

俞通淵以父兄故充叅侍舍人從大將軍征秦隴燕趙功陞督府僉事征哈刺哈至捕魚兒海獲酋長人畜班師轉餉二十萬石江西又征都勻龍場

諸蠻峒克辰沅寶應俘獲多 上又念通淵父兄功封越雋侯食祿二千五百石率師討建昌叛賊築城越雋二十六年坐累罷侯以家人還鄉建文元年召通淵爲豹韜衛指揮使戰歿白溝河子翊先卒次靖是年嗣官明年卒次端又明年優給錦衣未幾卒遂無後通源子祖病痿不能嗣孫宗曾孫信信宣德十年乞嗣信子瓏瓏子仲仲弘治五年乞嗣皆不許

吳良

吳良定遠人本名國興賜名良氣岸雄偉性質剛

直與弟禎俱以勇略稱元末良兄弟從取滁和采石姑熟定建康克鎮江下常州歷陞鎮撫守丹陽陞指揮使士誠據姑蘇跨有淮東浙西地大物衆兵食富強江陰當其要衝枕大江姑蘇通州濟渡喉襟之地士誠又多變詐數以金帛啗將士上移良守江陰諭曰彼以其詐我以其誠汝慎守封疆約束士卒毋外交毋納逋逃毋逐小利毋與爭鋒惟保境安民而已復命禎增兵協守敗敵侵兵陞樞密判官寇逼常州良遣兵間道殲其援兵于無錫自是敵舟師不敢泝大江上金焦召入見

上勞曰吳院判保障一方使吾無東顧憂賜車馬珠玉不足旌其能命館閣學士宋濂等贈良詩文良在鎮仁勇不妄刑殺儉素自持食不二味聲色貨利泊無所嗜夜宿城樓枕戈警備獎勵名節鼎新學宮崇尚士習絃誦相聞官無囂訟屯田平徭禁情詰奸居十年封境帖然上屢將兵下江西湖廣而東藩竟無擾者皆良捍蔽之功也旣克姑蘇移良蘇州衛武備益修軍民輯睦洪武三年封江陰侯食祿一千五百石與世券廣西右江叛良爲征南將軍討平其地移兵入銅鼓五開踣騰浪

諸溪洞蠻夷畏威懷德輸租奉法令八年上移
江南民十四萬田鳳陽壯京畿令良與李太師周
德興等督田事齊王封青州良營王府十五年卒
于青州贈江國公謚襄烈子高署前軍都督僉事
十七年嗣屢出山陝北平河南練兵從征二十八
年有罪調廣西從征趙宗壽靖難兵起高守遼東
與楊文數以遼東兵攻永平文皇曰高雖怯行
事差密文無謀去高文不足慮也遣人遺二人書
盛譽高極詆文故易其函投二人所二人得書並
聞建文君竟疑高削爵徙廣西獨命文守遼東竟

敗文靖難後召高鎮守大同高上言禦虜方略永
樂十二年被劾編氓江陰十七年奪券洪熙元年
上見高名曰高往年多行無禮謫戍海南高即死
徙其家會赦得釋宣德十年子昇乞嗣不許

吳復

吳復字伯起合肥人甲午率衆歸濠領前驅從克
泗滁采石太平歷陞萬戶定建康授總兵攻鎮江
斬元定定平章守常州吳兵奄至死戰躍馬持矛
追奔數里援宜興戰高橋仍守常州從征陳理圍
廬州先登下漢沔授鎮武衛指揮同知守沔陽克

汝州黃口陞安陸指揮使調征陝西土番克河州
從穎川侯平蜀從衛國公平九溪蠻進督府僉事
從西平侯再征土番洪武十二年封安陸侯世指
揮使從穎川侯征雲南克普定克總兵官勦殺蠻
寇比取廣西轉餉盤江卒追封黔國公謚威毅與
世侯券食祿二千五百石復衝冒矢石體無完膚
平居恂恂至臨陣奮發無堅不潰在普定買妾楊
氏年十七復歿慟哭已沐浴更衣自經死封貞烈
淑人十八年子傑以指揮嗣屢出山陝河南北平
練兵從征二十八年有罪與吳高皆從楊文征龍

州建功自贖建文中率師援真定戰白溝河失律
謫南寧衛指揮使永樂元年子璟乞嗣正統間再
三乞皆不許弘治六年璟孫鐸援詔乞嗣亦不許

康茂才

康茂才蘄人元末結義兵保鄉里立功至都元帥
上渡江時茂才力戰立寨天寧洲諸將以襄陽砲
破茂才寨茂才奔至京口不能脫率兵三千來降
頓首軍門曰前日之戰勦力爲主屢敗不振天數
非人力今願歸死效尺寸 上喜得茂才立拜秦
淮翼水軍元帥守龍灣敗馬馱沙克樅陽改營田

使 上曰比兵亂失耕乏食特設此官命汝興水利高下旱澇時其蓄洩屯田大獲仍兼帳前總制親兵左副指揮使友諒旣破姑熟將窺建康 上密諭茂才曰有事任汝能辦乎應曰惟命曰友諒且入寇吾欲速其來分其力給以虛實非汝莫可使者汝與友諒舊可僞降約爲內應者友諒來吾事濟矣對曰家有老閹舊事友諒令持書徃必信茂才爲書言上不足與有爲兵弱地蹙四面勅敵僕委身圈阱欲奮拔鱗翼儻大將軍分道遍進便當納款建康可唾手得也友諒得書大喜問康公

安在曰守江東橋問橋何爲曰木橋遣閹者歸書答茂才余某日至橋所呼老康公卽我應內外奮擊功成官賞不爾吝茂才以書上 上曰虜且墮穀中矣卽命善長日夜易橋鐵石友諒至見鐵石橋愕然又連呼老康不應遣視營中濟馬敝旗四散落落益大驚曰老賊給我語未畢伏兵四起友諒狼狽走得脫擒殺將士數萬茂才從破蘄黃戰鄱陽湖圍武昌有功陞副都護收湖南敗吳巫子門戰尹山橋逼蘇州軍其北門吳平進督府同知兼太子左率府使又從征下齊魯關隴鎮河中節

制太原諸城再征漢中卒追封蘄國公謚武襄子
鐸洪武三年以茂才功封蘄春侯食祿千五百石
與世券曰鐸嫡子也嫡終無後及庶長時鐸年十
歲入侍 皇太子讀書大本堂金鑄蘄國武襄公
五字牌賜鐸及其庶兄鑑鐸長督民墾田鳳陽征
辰州獠平松疊諸州有功巡並海諸城從徐將軍
征胡傳將軍征雲南皆有功卒於軍追封如父謚
忠愍子淵澄皆幼淵優給克散騎舍人巳而革冠
服勒居山西卒子勝永樂二十二年宣德二年再
乞嗣爵勝子永弘治七年援詔請嗣皆不許

耿炳文

耿炳文濠人父君用取滁和積功爲管軍總管克
采石取金陵丙申與士誠戰賈勇先登死炳文代
領其軍明年取廣德長興擒士誠守將降其兵會
立元帥府長興以炳文爲總兵都元帥辛丑敗士
誠將李伯昇追斬五千餘級拜指揮使吳元年破
蘇州陞大都督府僉事洪武初授鎮國上將軍兼
右率府副使二年鎮守陝西三年授秦王府左相
兼陝西行省右丞封長興侯食祿千五百石與世
券十四年破虜北黃河復還陝西二十四年賜鑑

鈔造第鳳陽葺先塋贈君用爲侯二十五年兩當
妖人作亂總兵討平之三十年克征西將軍勦平
蜀盜三十一年鎮守遼東建文元年靖難兵起炳
文爲征虜大將軍率衆二十萬北進至真定都督
徐凱兵十萬駐河間都督潘忠楊松營莫州先鋒
至雄縣 文皇出炳文不虞破其城忠松引衆來
援伏兵起忠等皆被執因得炳文虛實遂長驅至
真定張玉朱能譚淵來戰炳文大敗奔還滹沱河
東炳文衆尚數萬復戰衆潰皆降副將駙馬李堅
都督甯忠顧成指揮劉遂俱被執炳文固守真定

靖難兵攻城二日不能下而去炳文老將善戰至
是敗建文君始有憂色召還遣李景隆代炳文竟
至亡永樂二年刑部尚書鄭賜左都御史陳瑛劾
炳文衣服器皿僭飾龍鳳玉帶僭丹靛 上曰炳
文先朝老臣亦爲此其速改洪熙初盡以長興侯
田舍賜留守郭鑑云子璿駙馬都尉璘後軍都督
僉事瑄散騎舍人擢尚寶卿皆獲罪死

唐勝宗

唐勝宗濠人壬辰勝宗年十八挺身來歸從攻常
宣發池高郵安慶九江南昌敗友諒禁江口平潭

澧辰荆諸郡皆有功戍潁川從拔延安初勝宗自
中奕帥職歷龍驤驃騎安豐三衛指揮十餘年多
著勲績洪武三年封延安侯食祿千五百石與世
券出守雁門擒胡酋還征處衢溫山寇巡視陝西
屯田練兵移鎮遼東勅勝宗絕高麗曰舊歲今春
高麗之使水陸兩至此非臣禮暗行侮慢明彰褻
瀆此夷自古侮中國構兵禍可與絕交曩漢四伐
絕滅其國族魏再伐屠其都晉再伐焚其宮室俘
其男女五萬隋再伐城困將亡受降而免唐四伐
斬首五萬獲牛馬八萬餘夷王臧等戮於市遼五

伐焚其宮室斬亂臣康肇拔十餘城金一伐元五
伐夷王竄耽羅捕殺之耽羅以故竟爲元牧馬之
野爾出征遼左使至送來勿令其還以絕彼奸計
未幾高麗使復至勝宗察其奸奏上諭勝宗曰高
麗今春使至賄賂京官甚重內有一單云上等人
若干中等人若干觀此甚無禮受賂者少有知豈
不赧哉今爾知誘而能奏田豫不得獨名千古矣
遼壤東界鴨綠北鄰曠塞非多算不能守慎之勝
宗在鎮威讐惠懷兵民輯睦防奸禦侮邊境肅寧
二十六年卒

陸仲亨

陸仲亨濠人少負武略壬辰從征滁和姑熟平建康攻京口下常宣江陰婺越三衢常熟高郵皆有功從上親征取南昌下合肥拔安豐殲友諒宣力先登加帥職又從大將軍取贛州以驃騎衛指揮使改贛州衛鎮戍節制南安雄韶諸府調兵克梅州會昌湘鄉悉剗諸山寨自將取英德清遠晉江下廣州遂爲美東衛指揮使江西行省平章政事移鎮襄陽洪武三年封吉安侯食祿千五百石與世券明年出守雁門十三年胡惟庸事誣誤惟

庸誅法官請併罪仲亨上曰朕初起兵時仲亨

年十七喪父母兄弟避亂持一升麥藏草間朕見之呼來從朕長育成就累功封侯此吾初起時股肱心腹吾不忍罪其勿問十四年鎮成都烏蠻再叛仲亨佐傅將軍討之有功二十三年坐法論死子賢尚五皇女汝寧公主授駙馬都尉或曰仲亨與唐勝宗先坐擅調發無功論罪禁繫久之得赦後坐黨死上曰朕初先知仲亨反每見其居貴位無雍和之色時默默有憂容異態今竟爲家奴所發時同坐者侯十四人顧時胡均美勝宗仲亨

陳德費聚華中王志原楊璟朱亮祖梅思祖陸聚
黃彬金朝興

周德興

周德興濠人甲午來歸從定滁和渡江克采石太
平攻溧水破水寨遂收建康京口毘陵宣城江陰
池陽有功歷陞左翼大元帥從取金華安慶高郵
援安豐征合肥歷陞衛指揮從討贛州安福永新
有功尋提兵拔安吉西安再陞行省湖廣叅政左
丞從征廣東西洪武三年封江夏侯食祿千五百
石與世券爲征西左副將軍入瞿塘討明昇蜀平

移江南民十四萬田鳳陽上曰南安侯俞通源
關田弗勤役擬三月考管并日工一夫闢止四分不
及半畝遣卿督責尋理甯平務福建築海上諸城防
倭召還五溪蠻作亂德興請行時德興老上未
許德興請益力上壯而遣之賜手書至五溪蠻
悉散走四川水盡源通塔平散毛諸洞作亂德興
克征南將軍討平之師還賜田庄爲子孫世祿德
興請決荊州岳山壩通水利得漑田歲增官租四
千三百石俄往河南召集故元將校未幾思州五
開諸蠻亂克征虜將軍討之俘斬四萬二十五年

秋坐法論死收其公田

華雲龍

華雲龍定遠人善擊劍結羣少居韭山甲午來歸
從攻滁和爲千夫長克采石下姑熟縛將臺城擣
堅廣德鎮江陞總管戰舊館擒湯元帥漢人犯龍
江鼓勇先登復南昌戰彭蠡功進豹韜指揮使取
江陵還取淮東守高郵移掌淮安衛事從收浙西
平吳又從大將軍開中原爲都督府僉事鎮北平
兼行省叅政燕王左相築城建王邸洪武三年封
淮安侯食祿千五百石與世券再出雲州俘獲多

進至上都大石崖攻克劉學士諸寨擊敗驢兒國
公北奔去雲龍在鎮七年慎固防守威名大著坐
黨註誤命何文輝代雲龍未至京卒以侯禮葬子
忠

顧時

顧時濠人甲午來歸從攻得滁和渡江克姑熟下
溧陽平宣州廣陵功以百夫長陞元帥取安慶南
昌廬泰州海安陞同知天策衛事守禦臨濠從伐
蘇湖先登征中原轉戰關隴皆有功洪武三年封
濟寧侯食祿千五百石與世券爲左副將軍圍成

都平蜀又從李將軍北征分道入沙漠迷失道糧盡遇虜軍疲乏不能戰時獨引麾下數百人躍馬大呼衝擊虜敗走遂掠其輜重糧馬還軍復大振總諸衛軍鎮北平築堡障練士伍繕甲兵廣牧畜逾年召還尋復出鎮北平十二年卒贈滕國公謚襄靖子敬金吾前衛鎮撫十五年嗣侯爲左副將軍討平龍泉山寇屢從征有功次英華芳先是坐黨上特釋時以故子得嗣侯後竟除

陳德

陳德濠人世農家有勇力善騎射壬辰來歸從克

滁和克萬夫長取姑熟定建康下京口爲都先鋒得寧國衢婺陞大元帥從攻吳漢陞指揮使天策衛平吳爲僉事督府從平中原山東河洛燕晉戰功多洪武三年封臨江侯食祿千五百石與世券從傅將軍克成都又從馮將軍征沙漠遇虜別力篤山力戰擒元岐王克甘肅亦集乃路爲總兵節制諸軍仍出塞敗虜三岔山還屯陝西再出久刺河三戰三捷練兵北平禦胡越四年召還十一年卒贈祀國公謚定襄十三年胡黨誑誤時德已卒得宥明年子鏞以散騎舍人嗣十六年爲征南將

軍討平龍泉山寇廣東徭賊江西順天王召還後
屢從征皆有功十九年從宋國公出塞至金山與
大將軍異道相失遇虜死

郭子興

郭子興一名興濠人壬辰定遠郭子興所謂滁陽
王者據濠城稱元帥興隸麾下時 上在元帥甥
館專征伐興備宿衛從克滁和渡江拔采石取太
平定金陵先登授管軍總管克鎮江置五翼元帥
府陞統軍元帥圍常州晝夜不解衣甲生蟣蝨下
宣州江陰宜興婺州破南昌進克鄱陽彭蠡之戰

海艘駢進賈勇先登征武昌灑血馳戰斬獲多陞
鷹揚衛指揮使拔廬州援安豐陷陣大敗姑蘇兵
平襄陽衡澧還蹂高郵踣淮安剗吳興往往裹創
力戰平姑蘇陞僉事督府叅佐大將軍取中原守
潼關潼關三秦門戶李思齊張思道日覬覦興厲
兵積貯搃塞慎固屢敗其兵不敢東向移戍鞏昌
爲秦王府武傳兼陝西行府僉事洪武三年封鞏
昌侯食祿千五百石與世券賜地佃墾戶伐蜀克
成都練兵臨清巡北邊召還十六年卒贈陝國公
謚宣武子四景儀振宗官僧第英自有傳女弟入

宮進位寧妃與有弟德成事 上為驍騎舍人性
明爽見幾避禍以酒自放 上一日召授某府都
督懇辭不受 上變色曰朕念爾親且舊兄弟皆
登列侯而爾獨未顯故畀爾職何辭為德成免冠
泣拜曰臣性狂愚懶慢耽酒嗜臥不識事情緩急
儻位高祿重必任職司事苟不理 上殺我也人
情不過多得錢飲美酒隨意自適足了一生願卒
賜 上大喜曰善人舉能若此吾刑可措矣立書
勅賜黃封百罌金綵稱是寵待益厚德成嘗侍宴
後苑醉匍匐免冠謝髮禿落且盡 上笑曰醉風

漢毛髮如此非過酒耶德成仰首曰臣猶厭其多
欲盡剃始快意 上嘿然既醒大懼誤觸忌諱遂
盡剃髮披僧衣狂呼唱佛不已 上笑謂寧妃曰
前謂汝兄戲言乃實為之非風而何德成嘗見其
兄弟征鎮四方逾年不得歸輒笑其以虛名受辛
苦曾如我飲中樂耶已而黨事起死者相屬德成
益狂蕩不檢以壽終

王志

王志濠人有謀略壬辰起鄉兵取濠又明年來歸
謁 上滁陽從克和州采石姑熟溧陽金陵鎮江

圍常州屢騰柵先登身犯矢石陞右副元帥從平
常州寧國江陰征高郵擣九江下黃梅降南昌賊
友諒彭蠡從征武昌與賊選噉還克廬州援安豐
陞親軍指揮使守六安改六安指揮使北伐中原
從馮將軍渡河取懷慶澤潞留守平陽移漢中將
屯陝西深入察罕腦兒絕塞却胡還軍平陽累陞
都督同知洪武三年封六安侯食祿九百石與世
券賜田佃墾戶從大將軍統中軍征朔漠又從傅
將軍平雲南繕城隍立屯堡凱還十九年卒贈許
國公謚襄簡子四人威域璣琛威二十二年嗣侯

明年坐林來保事謫安南衛指揮使卒無子域嗣
改清平衛世官後坐志黨事 上以志死不問

鄭遇春

鄭遇春濠人與兄遇霖來附甲午從取滁鐵佛岡
三汊河大柳樹諸寨爲先鋒克和陽渡江拔采石
太平授總管攻蕪湖遇霖戰死遇春領其兵從征
取溧水破方山營定金陵解圍牛塘取宣州陞左
翼元帥從克揚州婺州再擊敗友諒兵下黃梅南
昌大戰禁江口殲友諒平武昌下淮安取安豐潁
六安陞六安衛指揮僉事留守征中原下汴洛陞

朔州衛指揮副使進都督僉事洪武三年封滎陽侯食祿九百石與世券坐累奪爵逾年復侯從平雲南經略城池屯堡凱還督金吾諸衛造舟海運二十三年卒

費聚

費聚濠人壬辰謁 上壯其狀貌留幕下從略定遠取驢牌得壯士三千人又降豁鼻山寨得八百人取靈璧儀真溧水定金陵下廣德長興爲副元帥副炳文守長興從 上戰鄱陽克武昌還攻廬州援安豐爲指揮同知克高郵淮安還攻舊館平

吳陞指揮使討方國珍下温台慶元由海道進取福州擒陳友定從征中原取山西守禦關陝改西安衛指揮使召爲督府僉事未幾出鎮平涼練兵洪武三年封平涼侯食祿千五百石與世券從傳將軍征雲南克普定置貴州都指揮司聚署司事討平雲南叛夷爲總兵征廣南俘斬萬計還鎮雲南召還鄉賜老二十六年卒子超征方國珍戰死次璿人材起家十八年試江西左叅政孫宏初克叅侍舍人衛鎮撫從征雲南功陞世指揮使二十年坐奏對不實戍金齒又明年召還侍養聚坐胡

黨 上曰聚曩征姑蘇朕嘗詈責遂有反謀後竟得釋

吳禎

吳禎初名國寶賜名禎定遠人江陰侯良弟少卓犖有膽畧從 上起兵里中克滁和時郭子興與上並駐和陽濠舊帥孫德崖率衆就食于子興已而有違言令其衆去德崖殿留城中 上獲德崖衆行二舍許忽報子興德崖軍闖城中大譁 上急呼禎還整兵且戰得不亂從克采石破水寨及方山營定金陵擣鎮江池州由帳前都先鋒爲總

管尋爲天興右翼副元帥助良守江陰僞吳與江陰接境每寇至擊走授親軍指揮使平吳陞督府僉事撫蘇州爲征南副將軍從湯將軍征國珍降進取福州擒陳友定還次昌國勦海寇兼左率府副使吳王左相兼都督僉事大將軍征陝西禎與馮將軍駐慶陽爲援洪武三年封靖海侯食祿千五百石與世券大軍戍定遼禎總舟師數萬由登州轉餉海道險遠禎善調度兵食充足召還未幾海上警聞復領沿海兵出捕至琉球大洋獲倭船獻俘自是時時往來海道總理軍務數年海上無

寇詔出兵定遼疾卒贈海國公謚襄毅子忠嗣侯
堅西安衛鎮撫

趙庸

趙庸廬州人與兄仲中率舟師來附從渡江拔采
石太平定金陵克安慶陞仲中僉院守安慶友諒
破安慶 上怒欲誅仲中常遇春曰仲中渡江勲
舊幸曲赦 上不許竟殺仲中庸以兄故特授僉
院從破安慶九江南昌陞叅知政事鄱陽之戰庸
及通海永忠等以六舟深入陷敵力戰大敗漢兵
死友諒賜庸金帛從平武昌克廬州安豐海安高

郵淮安從伐吳拔蘇州陞中書左丞從大將軍取
山東兼太子副詹事克東昌汴洛渡河取河北州
縣克元都西收晉秦諸郡走張良弼降李思齊還
搗永平過惠州至大寧也速遁破開平追奔至北
河俘元宗王三人元兵攻大同李將軍謀於庸出
雁門至馬邑擒脫列伯進兵東勝未幾慶陽平出
野狐嶺進兵察罕腦兒擒平章祝真又從李將軍
克應昌獲買的里八剌至苦脫孫紅羅山朔庭遂
空洪武三年封南雄侯食祿千五百石與世券伐
蜀定漳州海陽程鄉東莞撫籍廣州殄戶萬人爲

水軍討鏗平王獲賊黨萬人班師出山西理軍務
巡北邊召還二十六年卒

華高

華高含山人甲午入巢湖乙未來歸克采石溧陽
太平授總管破水寨方山營擒陳兆先從定金陵
鎮江陞秦淮翼元帥下丹陽金壇常州陞僉行樞
密院事擊敗趙普勝漢人犯龍江高與張德勝敗
之石灰山從征友諒克安慶搗九江援長興敗李
伯昇下南昌鏖戰鄱陽殲友諒克武昌陞湖廣行
省左丞從取海安高郵還攻下舊館進圍蘇州平

吳陞湖廣行省平章政事鎮禦湖廣洪武三年封
廣德侯食祿六百石與世券券成會高使廣東視
海南城池券留內府明年卒於崖州 上命中書
省補支高祿三百石卽無子納券墓中贈巢國公
謚武莊從子岳授指揮僉事

朱亮祖

朱亮祖六合人元義兵元帥乙未 上克寧國擒
亮祖喜其勇悍賜金帛仍舊官復叛歸元數與我
戰敗我兵七千餘人徐將軍等圍亮祖寧國常將
軍被創還 上自往督戰徐將軍奮攻縛亮祖見

上詰之對曰生則盡力死則死爾 上壯其言鞭而釋之從軍立功歷陞元帥至院判從征友諒克九江下南昌江西諸郡大戰鄱陽湖平武昌陞廣信衛指揮使會胡深討陳友定攻桐廬餘杭至杭州降潘原明陞浙江行省叅知政事副李將軍守杭帥馬步舟師討方國珍國珍拒戰敗奔黃岩亮祖入城遂徇下仙居諸縣進兵温州國珍子明善拒戰敗挈妻子遁去分兵徇瑞安還至黃岩方氏父子來降送建康爲廖征南副將軍取兩廣師還太子率百官迎勞龍灣洪武三年封永嘉侯食祿

千五百石與世券諸將伐蜀久無功亮祖爲征虜右副將軍濟師比至蜀傳將軍巴克階文永忠克重慶亮祖亦從克崇慶保寧蜀平還師與何文輝同鎮北平還巡淮陽移鎮廣東亮祖在鎮多不法番禺知縣道同聞上 上念功臣不下吏罷職令居江寧又坐胡黨十三年卒 上爲志壙以侯禮葬子暹從征有功爲府軍衛指揮使先亮祖卒

胡美

胡美沔人初名廷瑞仕友諒爲江西行省丞相守南昌遣宣使鄭仁傑詣九江降 上至南昌廷瑞

迎謁改名美仍故官從克海安太郵淮泗壽潁下
湖州進圍蘇州執士誠爲征南將軍由江西取福
建進中書平章兼同知詹事院事克建寧興化建
陽福州延平統兵守福建 上幸汴召還扈從洪
武三年封豫章侯食祿千五百石與世券改封臨
川侯董建潭王府長沙後坐黨事二十六年卒

韓政

韓政睢人元季爲義兵長 上定江左來歸授江
淮行省平章政事李濟據濠爲僞吳守 上命善
長書招濟不報 上曰濠吾鄉濟爲僞吳守是吾

有國無家可乎命政率指揮顧時等以雲梯砲石
四面攻濟濟出降留時守濠召政攻安豐以兵扼
四門攻不下潛穴城東龍尾壩二十餘丈壞城遂
破安豐忻都竹昌左君弼皆出走追獲忻都昌君
弼走汴竹貞來援又破貞克安豐至潁獲糧艘歸
淮東西悉平從平浙右北伐中原分兵扼黃河斷
山東援兵取益都濟寧濟南東平改山東行省平
章政事大將軍取元都檄政會東昌鎮撫臨清元
都定又令政分兵守廣平蟻尖寨者在林慮西北
二十里元右丞相庸等據寨剽剽旁近給軍食徐

將軍收諸山寨蟻尖寨恃險絕未下政進攻庸降
調征陝西還兵守禦河北洪武三年封東平侯食
祿千五百石與世券移鎮山東未幾復征河北招
撫流移出居庸擣應昌取和林深入土刺進至阿
魯渾河大獲而還出巡河南再巡陝西練兵臨清
十一年卒贈鄆國公子英散騎舍人

黃彬

黃彬未詳何許人從徐壽輝守袁州友諒殺壽輝
歸友諒上拔江州彬來降授江西行省叅政從
取新淦復南昌大戰鄱陽湖克武昌上書諭江

西守將鄧將軍曰熊天瑞龍鳳八年降今負初言
理宜聲討令彬從鄧將軍討贛州贛州平留鎮移
袁州置袁州衛洪武三年封宜春侯食祿九百石
與世券討捕上猶山寇駐臨清練兵後坐胡黨
上念其未嘗失朝廷禮宥之數年卒

曹良臣

曹良臣安豐人壬寅率所部來歸爲江淮行省叅
政從征廬州大戰鄱陽湖征陳理進取海安太郵
淮濠泗攻湖州平姑蘇陞行省江淮左丞從取中
原克山東濟寧汴梁河南潼關旋師渡河克衛輝

廣平會師臨清取德州長蘆直沽至河西務自通
州進克元都邏古北諸隘口陞山西行省平章政
事下保定河間澤潞守通州從征陝西復守通州
王保保爲西北邊患從征大敗其衆出哨沙漠洪
武三年封宣寧侯食祿九百石與世券征蜀克歸
州至瞿塘關會重慶降明昇蜀平四年從李將軍
征迤北領東道兵出和林深入至阿魯渾河及其
裨將周鎮常榮張耀戰歿贈安國公謚忠壯子太
嗣侯

梅思祖

梅思祖夏邑人元末父爲王保保所醢歸張士誠
爲中書省右丞守淮安大將軍下高郵思祖封府
庫籍甲兵來歸士誠殺其兄弟數人 上憐之授
大都督府副使制曰辭項從劉知同曲逆舍囂去
述識擬伏波從取浙西克舊館圍蘇州縛士誠陞
浙江行省右丞從征中原克山東取汴河下潼關
旋師徇河北守彰德檄赴北平征山西入秦汧取
興元洪武三年封汝南侯食祿九百石與世券從
伐蜀征甘肅練士馬北平巡視山東陝西遼東城
池四川水盡源通塔平散毛諸洞叛爲征南副將

軍討平之會平雲南置貴州都指揮司署思祖都
指揮使又置雲南布政司與平章潘原明同守雲
南思祖善撫輯民夷安之十五年卒子義武德衛
指揮陞遼東都指揮使從子殷駙馬都尉自有傳
思祖卒後坐胡黨戮其家

陸聚

陸聚不知何許人元樞密同知守徐州來歸為江
淮行省叅政仍守徐州元擴廓帖木兒遣兵侵徐
駐陵子村聚令指揮傅友德率兵二千禦戰敗去
益兵復來戰擒其將從取中原克山東歸德汴梁

還鎮改山東行省叅政從克德州長蘆定元都略
大同保定中山真定攻鳳山成山鐵山三寨復取
故關山寨守井陘征陝西仍鎮徐州討平沂邳叛
人洪武三年封河南侯食祿九百石與世券移鎮
山東承制理軍務福建召還坐胡黨 上念其為
奸臣所誘宥之尋卒

葉昇

葉昇合肥人歸 上和陽從渡江拔采石定金陵
京口授管軍總管復太平陞右翼元帥從征友諒
破安慶擣九江下南昌大戰鄱陽克武昌陞指揮

僉事拔廬江襄陽淮東克湖州進平吳陞府軍衛
指揮使從取明州還征中原陞督府僉事充叅將
征蜀入重慶陞都指揮使鎮守西安復陞督府僉
事西番叛昇與都督王弼等往征降乞失迦夷其
部落復討平延安伯顏帖木兒擒洮州番酋洪武
十二年封靖寧侯食祿二千石世指揮使鎮守遼
東諭昇絕高麗修海蓋復三城召征雲南平班師
二十五年坐胡黨論死

張溫

張溫不知何許人從取太平定臺城京口歷陞千

戶鏖戰鄱陽湖收武昌陞統軍元帥略湖南征淮
東克舊館下湖州平吳從征中原克陝西下蘭州
留守元將王保保襲蘭州圍溫鞏昌守將指揮于
光來援至馬蘭灘卒遇保保兵戰敗被執至蘭州
城下使呼張將軍出降光大呼曰公等堅守徐將
軍將大兵行至矣城中聞光言守益固相持數月
引去陞督府僉事爲叅將伐蜀克階文成都崇慶
討平西番羌戎降朶苾酋萬戶乞失迦洪武十三
年封會寧侯食祿二千石世指揮使理河南軍務
營周邸從征雲南出塞皆有功後坐黨論死

王弼

王弼定遠人膽略過人號雙刀王初結鄉里依三臺山樹柵相保丙申率部下來歸備宿衛克池州石埭婺源授元帥下蘭谿金華諸暨紹興援池州復太平攻武昌大戰鄱陽截擊禁江口平武昌還收廬江援安豐破襄陽安陸還取淮東克舊館湖州陞指揮使圍蘇州軍盤門士誠被圍久突出轉戰盤門欲奔常將軍分兵北濠截其後遣兵與戰戰良久未決常將軍拊弼背曰軍中皆稱爾猛將能爲我取此乎弼卽馳鐵騎揮雙刀奮擊却敵常

將軍乘之吳兵大敗人馬溺死沙盆澤甚衆士誠馬驚墮水幾不救肩輿奔入城吳平從征中原下山東河南北遂克元都保定中山進兵太原自河中渡取陝西兵至察罕惱兒及紅羅斷頭山進僉督府事討西番獲馬牛羊駝二十二萬班師洪武十二年封定遠侯食祿二千石世指揮使從征雲南功與世侯劾加祿五百石爲副將軍征大寧東出遼東征納哈出二十二年詔功臣還鄉二十七年卒

曹震

曹震濠人立功開國時洪武十二年以征西功封景川侯食祿二千石世指揮使十三年與營陽永城二侯屯田北平從傅將軍征雲南取臨安諸路十八年請討施南朶朶上曰以利而動非兵之善慎宜鎮靜遣置四川傳道召還鄉未及行又命覈征士四川代藍玉還京上便宜五事報可二十四年往四川鑿石通河爲灘百九十三爲橋五十四永寧至大理建昌至西番皆爲驛舖詢議任勞雨雪不避坐藍黨論死

曹興

曹興一名興才未詳何許人從取姑熟定建康克南徐收武昌陞指揮僉事平吳陞指揮使從征中原定元都陞河南行省叅政討西番洮羌征朶朶凱還洪武十二年封懷遠侯食祿二千石世指揮使理軍務山西已而北征有功洪武中卒

周武

周武不知何許人從取江南滅漢攻淮東平吳積戰功歷陞指揮僉事從征中原歷陞都督僉事西番叛爲叅將與藍玉張龍張溫王弼等從沐將軍討平之取朶朶獲人畜十餘萬洪武十二年封雄

武侯食祿二千五百石世指揮使理軍務河南巡北邊訓練士卒召還京復出巡河南洪武中卒

金朝興

金朝興巢人初結里中少年立砦會俞氏父子廖氏兄弟以舟師來歸卽率衆從 上渡江克采石定建業下京口廣德宣城常州授都先鋒取江陰湖州復宜興陞左翼元帥 上自將取婺州朝興爲奇兵征紹興拔諸暨復太平克九江下黃梅臨江吉安大戰康郎山截擊禁江口漢平陞龍驤衛指揮同知取襄陽調鎮武衛收淮東濠泗睢宿從

攻舊館下湖州平吳陞振武衛指揮使又從征中原徇河北擣長蘆直沽河西務通州定元都遂下保定中山征山西略大同衛征宣府取東勝陞督府僉事世指揮使兼秦王傳尋命專爲王傳解都督伐夏破成都征迤北領東道兵取和林至土刺河征西番俘殺數萬獲馬二萬牛羊駝二十萬得納隣七站洪武十二年封宣德侯食祿二千石世指揮使從征雲南建昌至會川卒贈沂國公謚武毅十七年以雲南功授世券食祿二千五百石子鎮嗣二十三年坐黨降平壩衛指揮累功陞都指

揮卒子潤嗣戰沒潤弟澄澄子桂桂子琮琮子聲
聲子昂世官聲功陞都指揮僉事

薛顯

薛顯蕭人元泗州守將也來降立功陞指揮守南
昌禦陳友諒陞江西行省叅政從征淮東又從常
將軍轉戰德清偽五太子及朱暹呂珍以舊館降
五太子者士誠養子短小精悍平地躍起高丈餘
又善沒水劫營沉船暹珍皆驍將能戰士誠失此
三人大窘顯縛珍狗湖州守將李伯昇降陞左丞
行省大將軍北征 上曰薛顯勇冠三軍足當一

百偏師征山東河南北有功克北平俘獲數萬征
山西進攻陝西敗王保保我兵攻慶陽保保爲張
良臣聲援數出撓我顯駐靈州遏保保破慶陽誅
良臣又追破賀宗哲六盤山洪武三年封永城侯
食祿千五百石以專殺千戶吳富奪其俘獲及殺
馬軍謫海南分顯祿爲三二贍千戶馬軍家一與
顯母妻子已而念顯力戰有功召還與世券督兵
屯田北平練兵巡北邊征降納哈出還次山海關
卒贈永國公謚桓襄無子弟綱幼妻張納券顯後
坐黨事以死不論弘治六年珍自稱顯曾孫乞嗣

不許

胡海

胡海字海洋定遠人來歸授百戶從敗賈魯兵克泗滁爲萬戶從渡江定采石太平拔蠻子海牙水寨鎮江敗謝璽選克先鋒攻宜興麇戰紹興擒賊陞都先鋒攻廬江數傷矢刃戰益力 上壯其勇授花鎗上千戶從克荆澧衡潭擢寶慶指揮僉事陞使鎮益陽從楊璟征湖南廣西抵廣西爲左副總兵勦左江上思蠻從克雲南俘斬多調征蜀克涇湯關殺其守將洪武十九年以平雲南功封東

川侯食祿二千五百石與世券卒子斌立功陞都督同知征雲南戰歿無子次子觀尚南康公主爲駙馬都尉未嗣卒宣德十年公主乞子忠嗣授孝陵指揮僉事陞都指揮同知正統元年公主乞忠嗣斌都指揮同知

張翼

張翼臨淮人父聚來歸立功授前翼元帥從平江南淮東累遷指揮同知致仕翼隨父軍中勇而善戰嗣父職從北伐及征陝西擒戮諸叛賊陞都司僉事再陞督府僉事從征雲南克普定曲靖取鶴

吳如詩傳 卷一
慶洪武十九年封鶴慶侯食祿二千五百石與世
券坐藍黨論死

仇成

仇成含山人乙未從渡江克采石太平定金陵下
鎮江爲領軍先鋒收毘陵寧國池婺擢統軍大元
帥從取安慶破江州援安豐大戰鄱陽湖陞指揮
僉事平吳陞指揮使守安慶陞督府僉事洪武十
二年封安慶侯食祿二千石世指揮使克征南副
將軍征容美諸洞還至常德從征雲南克普定普
安曲靖與世侯券加祿五百石二十一年卒贈皖

國謚莊襄又明年子太嗣太子宗宗子銘銘子璋
不得嗣

楊璟

楊璟合肥人本儒家子少沉毅讀書不喜章句好
武略來歸授管軍萬戶溧水句容金陵功陞管軍
總管鎮江江陰功陞親軍副都指揮使婺諸暨功
陞樞密判官從征友諒克九江黃梅廣濟立湖廣
行省璟爲叅政移鎮江陵討斬叛寇進攻湖南洞
蠻駐師三江口招討功陞平章政事克征南將軍
取廣西降土官黃英衍岑伯顏還京爲偏將軍征

山西平唐鄧南陽留鎮未幾招諭明昇昇不從璟
還復書與昇曰昔據蜀者最盛莫如昭烈孔明佐
之訓練士卒財用不足取之南中然猶朝不謀夕
僅能自保足下疆場南不過播州北不及漢中而
欲以一隅之地綿頃刻之命可謂智乎若謂險阻
可恃蠶叢魚鳧之鄉不至足下矣鄱陽一戰友諒
授首旋師東討張氏面縛此非人力實天命也友
諒子胤歸江夏王師致伐勢窮出降 主上宥罪
封侯恩榮之盛天下所知足下幡然覺悟自求多
福豈不賢智哉今爲足下謀者他日或以郡獻或

以城降各自爲身計取富貴當此時老母弱子將
安歸乎卽足下年幼未諳時勢語及老母獨不痛
心乎禍福利害瞭然可觀逆順之途在足下審之
而已昇不能從湖廣慈利土酋覃垕諸蠻爲亂璟
討之賊遁溪洞還兵洪武三年封營陽侯食祿千
五百石與世券從伐蜀次夔州進攻瞿塘璟戰不
利赤甲白鹽之師亦退還歸州蜀旣平 上以璟
無功不賞沅辰蠻亂爲副將軍討平之師還佐大
將軍鎮北平召還又赴北平練兵兼領遼東訓練
士卒十五年卒贈芮國公謚武信子通十七年嗣

侯十九年與靖寧侯葉昇捕象廣西左江十萬山
二十年領韃靼官軍往戍雲南多道亡降普定衛
指揮使次達散騎舍人

汪興祖

汪興祖巢人初爲張德勝養子德勝戰歿子宣幼
興祖嗣職從張姓征友諒與俞通海趙德勝擣水
寨抵江州克其城進拔蘄州從取南昌士誠圍劉
福通安豐興祖從 上援敗其衆還攻廬州鄱陽
之戰興祖等六舟深入搏戰又邀擊禁江口敗死
友諒擢湖廣行省叅政陞督府副使克淮東下湖

州平吳陞同知督府從大將軍北征取山東州縣
孔子五十六世孫衍聖公孔希學聞大軍至率曲
阜尹希舉鄒主簿孟思諒謁軍門興祖禮之克東
州縣皆降兼領右率府事克汴梁還濟寧取元都
狗永平下山西收大同時宣已長嗣父職興祖乃
復姓克武朔爲晉王武傳兼山西行督府僉事洪
武四年封東勝侯人有言其過者 上弗問亦弗
與誥券令自效圖實封從傳將軍克階文蜀平章
丁世真據險距我興祖躍馬直前中飛石死詔都
督興祖沒王事授原封侯爵世券食祿千五百石

興祖子幼以所賜田五頃令與宣同居後疾卒

李新

李新濠人癸巳來歸從克滁和渡江拔采石取姑熟鎮江江陰婺諸暨彭蠡大戰平武昌取江陵累功陞正千戶下湖州圍平江平吳陞指揮僉事守茶陵爲督府僉事營孝陵有功洪武十五年封崇山侯食祿千五百石二十八年坐事死

謝成

謝成濠人從克滁和渡江拔采石太平金陵功授總管南徐功陞管軍千戶鏖戰彭蠡平武昌淮東

轉攻湖州克姑蘇陞指揮僉事從征中原平元都收趙燕魏諸郡遂取山西破陝西平涼莊浪陞指揮使爲晉王府相征朶耳甘降萬戶乞失迦討平洮番十八族洪武十二年封永平侯食祿二千石世指揮使巡北邊訓練士卒召還二十七年坐累卒田宅並賜汪嬰

張龍

張龍濠人從渡江立功陞都督先鋒攻花鎗千戶吳元年陞威武衛指揮僉事領偏師立功陞都督征西番斬獲招附功多洪武十二年封鳳翔侯食

吳女言傳 卷上
祿二千五百石與世券子麟尚福清公主爲駙馬
都尉龍卒麟歸葬父還京卒孫傑侍母公主京師
永樂中卒囚失侯傑子綱宣德十年援詔恩乞嗣
侯吏部言龍侯不嗣者四十年不許

陳桓

陳桓濠人略定遠克滁和渡江取采石太平克副
先鋒收寧國戰彭蠡定荆湖淮揚下湖州平吳討
方國珍陞指揮副使平中原陞督府僉事征雲南
桓與胡海郭英率兵五萬由永寧趨烏撒克曲靖
城烏撒得七星關通畢節進克大理洪武十九年

封普定侯食祿二千五百石與世券與靖寧侯征
東川龍海俘獲還二十年又與靖寧侯總制雲南
諸軍立營屯田後坐黨論死

張赫

張赫濠人歸附授千戶從克定遠泗滁和州拔采
石太平陞總管收集慶鎮江常州進常春翼元帥
守常州大戰鄱陽湖禁江口征武昌降陳理下湖
州平吳討方國珍克慶元溫台降國珍陞福州衛
都指揮副使捕倭功陞同知署都司事坐捕倭無
功奪俸統哨出海入牛山洋遇倭追至琉球大洋

擒倭酋調興化衛還俸召陞督府僉事時遼東艱
食命赫督海運庚申辛酉歲一行捕東椒山寇仍
督遼運癸亥甲子乙丑丁卯歲一行二十年封航
海侯食祿二千石與世券復三督海運二十三年
卒贈恩國公謚莊簡子榮累功至指揮使未嗣侯
孫鑑指揮使陞福建都指揮使巡海捕倭擒賊楊
總從成國公征廣西留鎮交趾曾孫寧

朱壽

朱壽未詳何許人從征爲萬戶渡江取江左郡邑
陞總管收常婺克武昌平蘇湖轉戰南北積功歷
陞督府僉事與張赫轉餉有功二十年封舳艫侯
食祿二千石與世券後坐黨論死

張銓

張銓定遠人從取太平定建康南徐毗陵婺州討
僞漢擣江州戰鄱陽湖收鄂渚攻淮東平吳累戰
功歷陞指揮僉事從取中原下濟南克汴洛燕晉
三秦四川累陞都督僉事董建齊邸青州征退五
溪蠻討平水盡源通塔平散毛諸洞從征雲南有
功洪武二十三年封永定侯食祿千五百石與世
券子嗣指揮使

孫恪

孫恪父興祖恪以父功嗣指揮使嘗在 上左右
謹敏小心未嘗有過歷戰功陞都督僉事洪武二
十一年爲右叅將從藍玉征胡至捕魚兒海先登
陷陣野戰有功二十二年封金寧侯食祿二千石

濮璵

濮璵父英廬人少勇敢開國累功爲西安指揮陞
都督僉事洪武二十年馮將軍征納哈出旣受降
餘衆驚潰竄匿盡驅其降衆入山海關諸降人大
恨餘衆諶伏於途邀襲大軍英爲殿虜伏發衆寡

不敵英復馬踣被執英絕食不言乘間自剖腹而
死二十年贈金山侯謚忠襄明年贈樂浪公時璵
生數月 上念英忠卽襁褓封璵西涼侯食祿二
千五百石璵年幼趨朝跣傷命鑄玉字牌懸璵冠
俾人遜避嘗從大將軍征討有功又出練兵臨清
二十六年坐黨戍五開生子真女適寧河王子鏞
永樂元年鏞爲璵子陳情赦真賜鏞爲子

胡顯

胡顯臨淮人父泉立功開國時歷官定遼都指揮
同知昭敬皇妃泉妹也妃生楚王封武昌改顯武

昌護衛洪武十四年從王之國顯隨父陞辭上
曰泉老矣致仕顯嗣官從王征銅鼓諸蠻功陞督
府僉事侍王二十一年從普定侯靖寧侯征東川
龍海諸蠻得城邑馬畜珍寶獻上明年封梁國
公食祿若干石與世券出入朝禁者十年建文三
年坐交通楚王革爵父子並徙臨襄山安置泉竟
死山中永樂元年楚王言母兄弟胡泉泉子顯無
罪廢屏臨襄泉死矣乞赦顯召顯授皇陵衛指揮
僉事改鳳陽陞同知楚王又言顯母在武昌乞還
顯養母顯還武昌卒至曾孫深調都勻衛僉事

何真

何真東莞人少英偉好書劔元末歷河源縣務副
使嶺海騷動棄官歸鄉里率衆保障遂併有循惠
二州元授江西分省左丞洪武元年廖將軍率舟
師取廣東至福州遣人書諭真師至潮真遣都事
劉克佐詣軍門上印章籍郡縣戶口兵糧奉表降
廖將軍送使表詣京師賜詔褒真實李奚讓驛召
來庭真遂乘傳入朝授江西行省叅政轉山東陞
山東右布政使十六年致仕又命收集廣東兵民
十八年遷浙江右布政使明年來朝陞湖廣左又

明年致仕封東莞伯食祿千五百石二十一年卒
子榮嗣伯先是子貴侍太子爲兵馬指揮陞鎮南
衛指揮僉事充尚寶司丞榮後坐黨論死真弟迪
反南海遁入海島捕至京伏誅

陳理

陳理父友諒死兄善兒被擒理稱漢皇帝 上至
武昌出降封歸德侯又封友諒父普才爲承恩侯
兄友富歸仁伯友直懷恩伯弟友仁贈南康王理
居京師鬱不樂出怨言 上曰此童孺小過不足
問恐爲小人蠱惑不得全朕恩宜處之遠方洪武

五年徙高麗遣元樞密使延安答理護行賜高麗
王羅綺令善視理時蜀明玉珍子昇降封歸義侯
與理同徙高麗普才徙滁

買的里八剌

買的里八剌元順帝孫也洪武三年征虜左副將
軍文忠克應昌元太子愛猷識理達剌遁去獲買
的里八剌送至京 上免獻俘封爲崇禮侯奉元
祀五年 上貽元主書又與元臣劉重德朱彥德
書令遣使迎買的里八剌七年遣北歸

納哈出

納哈出者元木華黎裔孫也爲萬戶上初獲納哈出待之如子居常不樂上令降萬戶黃疇察其去就納哈出求歸上欲從之徐將軍從旁力阻上曰人臣各念其主况有父母妻子之思竟資遣去納哈出旣歸出沒遼東塞下殺掠吏民洪武十九年馮將軍率兵三十萬擣金山降納哈出及其部落二十餘萬明年至京師封海西侯食祿二千石賜其官屬衣冠有差仍授指揮千百戶食祿不任事分其衆隸雲南兩廣福建諸都司從征稍有功二十一年隨傅將軍征雲南至武昌卒納

哈出嗜飲燒酒盛夏水浴因得疾上每戒其過飲不聽竟以是死賜葬南京是年改封其子察罕瀋陽侯坐黨死

盛庸

盛庸不知何許人亦未詳其始自起建文時充叅將隨耿炳文軍失利又隨李景隆戰燕齊間互有勝負已而與鐵鉉守濟南靖難兵圍甚亟庸夜出劫戰晝憑城禦防盡毀靖難兵諸攻具捷聞陞鉉兵部尚書封庸歷城侯食祿千石充平燕將軍總兵官代景隆北進與靖難兵大戰東昌夾河殺張

玉譚淵靖難兵長驅至淮上庸進戰靈壁齊眉山
皆敗遁還駐高資港又敗 成祖卽位庸歸命勅
曰比以山東未定命卿鎮守淮安今鐵鉉就獲諸
郡悉平朕念山東久困兵革憊於轉輸卿宜輯兵
養民以稱朕意永樂元年致仕千戶王欽劾庸罪
狀陞欽指揮同知賞銀百兩未幾都御史陳瑛劾
庸口出怨言懷異圖請誅庸遂削爵庸暴卒

李堅

李堅武涉人父英開國有功爲驍騎右衛指揮僉
事力戰死烏撒贈指揮使堅尚 太祖第七女大

名公主爲駙馬都尉嘗與駙馬歐陽倫梅殷陸賢
賑北平建文君卽位進公主大長公主堅素負才
勇克左副將軍佐耿炳文北進遇靖難兵炳文謹
備西北靖難兵突擊出不意破東南炳文敗丘福
又攻子城堅出接戰互有勝負封灤城侯食祿若
千石與券已而兵敗滹沱河薛祿引槊中堅墮馬
祿揮刀斫堅堅大呼我李駙馬勿殺祿擒堅見
成祖謂爾至親今至此奈何械送北平道卒子莊
以公主故特宥當嗣侯公主懼禍繳誥券莊流寓
南京詩酒終其身公主至宣德初卒或曰堅子莊

吳女言傳作 卷上
嗣侯謚威莊弟成爲中都留守改山東都指揮成
子陞世南京衛指揮使

皇明異姓諸侯傳上卷終

子履準校

孫心材重校



